

Post Hemum Franciscus Diedus & Franciscus Justinianus eo munere apud Regem sunt functi. Novissime vero, Scodrensi obsidione nunciata, Patres Sebastianum Badovarium cum ingenti auri pondere ad illum miserunt. Is sub primum accessum, non magis auro quam ingenii dexteritate, ita Regis animum in omnes partes versavit, ut continuo sumptis armis, tantum terrorem Othomano injecerit, ut per literas Eunuchum ex Scodrensi obsidione revocaret. Perrexit Patrum decreto Badovarius apud Regem esse, fuitque apud illum biennio & amplius, quo sane tempore multa præclara Pannon facinora in Turcos edidit. Nam præter quod sexies prospere adversus eos dimicavit, Sabazam oppidum munitissimum cum mille ex regia cohorte, quos Janizaros vocari diximus, Othomano ademit. Cæterum, illato Stephano Vaivodæ bello, quum hostis Zuzanam urbem nobilissimam ingenti armorum apparatu oppugnare adortus esset, audito Pannonis motu, operibus bellicis impedimentisque relictis, soluta repente obsidione, turpi fuga inde abiit. Atque ita sane evenit, ut aliquandiu res Veneta hujusmodi præsidio defensa, nullum prorsus ab hoste incommodum acceperit. Quo factum est, ut Venetis auctoribus communi plurium Italiæ populorum ac Principum nomine centum aureorum nummum millia per Arietensem Antistitem & Antonium Victorium, qui Badovario successit, sint ei in Pannoniam missa. Solimanus ab Othomano revocatus, machinis continuo disfractis, tertio ferme mense, postquam eo venerat, soluta obsidione, in Macedoniam concessit. Hoc magis placet, quam illud quod ajunt quidam, eum territum quod in Italia ingentem armorum vim in se comparari audiverat, obsidionem solvisse. Scodrenses, quorum supra duo millia diversis casibus occubuerant, quum ad id inopiæ aquarum ventum esset, ut vix modicum quid singulis distribuendo, tres adhuc dies suffecturæ crederentur, abeunte hoste, præcipientes sitibundum agmen ad subjectum flumen ruunt, desideratamque multis diebus aquam tam cupide hauriunt, ut multi ea repleti, stupidi, rigentibus membris, statim exanim-

1474

*Scodra obsidione solvitur.*

mes